



UNIVERSITÄTS-
BIBLIOTHEK
PADERBORN

Universitätsbibliothek Paderborn

Ivdex Magistratvs Senator

Zype, Franciscus van der

Antverpiæ, 1633

Cap. II. Iudicum, Iudiciorumque maiestas.

urn:nbn:de:hbz:466:1-14280

2.
Partitio
operis.

Qualibus in hoc stadium vacandis insumetur primus hic liber. reliqui ad actionem Iudicis pertinebunt; secundus quidem ad Iudicia: tertius ad regimen, administrationemque Reip. quartus ad ea quæ spectant supremæ potestatis negotia.

C A P V T II.

Iudicum, Iudiciorumque Maiestas.

Dignitatem Iudicum, iudiciorumque Maiestatem commonstrat ipse Deus, qui primus ea exercuit, & exercebit vitimus. nam quod attinet Reip. gubernationem & bellorum administrationem, nihil opus hinc dicere, ea sponte in omnium oculos incurrit. Deus ergo transgressum iussa sua Adamum vocavit, audiuit, damnauit. denique omnes à mundi origine nati homines & vsque ad eius interitum orituri expectamus terribilium illorum præconum tubas, & vltimum diuini Numinis iudicium. *Reges*, inquit Cic. l. 1. de Off. iustitiæ reddendæ causa primum constituit. Adeoque apud omnes orbe diuinitus creato gentes tyranni, Reges, Imperatores, iudicia exercuerunt, per sese, & in vicem suam substitutos. Vnde Populus Israël ad Samuelem lib. 1. Reg. c. 8. *Constituë nobis regem, qui iudicet nos, sicut & vniuersæ habent nationes.* & lib. 2. Reg. c. 15. Absolon regnum paternum affectans, *Quis me, inquit, constituat Iudicem super terram, ut ad me veniant omnes qui habent negotium, & iustè iudicem?* sed & Regem insimulans malè administrati regni, *omni viro qui habebat negotium ut veniret ad Regis iudicium, dicebat; Videntur mihi sermones tui boni & iusti; sed non est qui te audiat constitutus à Rege.*

Apud Ægyptios quidem eidem erant Sacerdotes, & Iudices; neque apud Gallos procul ab his aberant Druides. & Augustus statuit vt in loco Senatus thure, & mero sacrificaretur. Athenienses res graues apud Aras præstito iuramento iudicabant. & in Iure nostro sacræ leges, l. 1. D. de leg. l. leges Sacratissime. C. eod. & Iudices Sacerdotes. l. 1. de iust. & iur. & Antistites l. 1. C. de decret. curial. l. 11. dicuntur. Iustitia si quidem sancta, & iura in quibus elucet sancta, & Iudices igitur, qui eam colunt, & ius dicunt, sancti. qui enim sancti non sunt, sancta tractare non possunt. c. Maximinian. d. 81. & rectè Virg.

Iura Magistratumque legunt, sanctumque Senatum.
Quin & in populo Dei nondum admissis regibus, apud quos
rei

rei summa erat, Iudices dicebantur. Iudicia testimonio Iosaphat, 2. Paral. 19. Dei sunt: qui igitur ea exercent Iudices, Dei ministri. Rom. 13. 4. & Valent. l. 1. de offic. vic. Indicationis nostrae solet representare reuerentiam. & Cassiod. in form. Rect. provinc. A Principe, inquit, frater vocaris. vt magnificè Dauid Psal. 81. ego dixi, *Dij estis, & filij Excelsi omnes.* Filij ergo cum sint Dei, habere ita se debent, vt ne personam, nec actionem, quam representant, ignominiâ suâ dehoneſtent. Neque famosis, igitur, & notatis, & quos scelus aut turpitudine vite inquinat, & quos infamia ab honestorum cœtu segregat, dignitatis portæ patebunt. l. 2. C. de dignit. vt nec criminis quidem postulatos tantum, donec se purgauerint, honores appetere permittit Alex. Imp. l. reos C. de reis post. l. 10. Turpi autem iudicio damnatus, inquit Cicero pro Cluentio, in perpetuum omni honore & dignitate priuatur. Sed quid ergo sibi vult Epistola D. Pauli 1. ad Corinthios 6. *Secularia iudicia si habueritis, contemptibiles qui sunt in Ecclesia, illos constituite ad iudicandum?* Non agit ibi D. Paulus, aut differit, quis esse, vel qualis Iudex debeat: sed ne fideles in ius vocent fideles coram Iudice infideli. non est, inquit, inter vos sapiens quisquam, qui possit iudicare inter fratrem suum? sed frater cum fratre, iudicio contendit: & hoc apud infideles? Ad verecundiam vestram dico. sic non est inter vos sapiens quisquam? Vult ergo vt potius, quàm id permittatur, contemptissimus quilibet, modò fidelis, iudicet, quàm infidelis adeatur. (ad quam rationem & Concil. Carthag. 4. c. 87. eum excommunicat, qui ad alterius fidei Iudicem prouocat.) neque enim D. Paulus iudicia à maioribus & dignioribus reiicit. An nescitis, inquit, quoniam sancti de hoc mundo iudicabunt? nescitis quoniam Angelos iudicabimus, quanto magis secularia? Ita D. Chrysoſt. & August. ad Procul. ep. 47. imò D. Augustinus in l. de opere monachorum, ait, sese ex hoc loco Pauli cogi ad suscipienda iudicia causarum, cum esset Episcopus. & continuus Ecclesiae Christianae vsus habuit, vt Episcopi, Metropolitæ, Papæ, Imperatores, Reges, Principes, & Præsides sub variis nominibus, Iudices Christiani, & è populo selectiores, iudicia tractarent.